

KALITATEA. Europar sari hori jaso duen aurreneko finantza erakundea da



GARI GARAIALDE / ARGAKZI PRESS

Euskadiko Kutxak Urrezko Q saria jaso du

Urrezko Q saria jaso zuen atzo Euskadiko Kutxak Juan Jose Ibarretxe lehendakariaren eskutik. Finantza erakunde horretako 24 ordezkariari eman zien Ibarretxek Q sariaren intsignia, besteak beste, Euskadiko Kutxaren bazkide fundatzaileei. Europako Batasunean EFQM kalitate ereduaren 500 puntutik gora jaso dituen aurreneko finantza era-

kundea izan da Euskadiko Kutxa, eta horregatik «Euskadiko gainerako enpresen eredu» dela nabarmendu zuen Ibarretxe lehendakariak. Kalitatearen Bikaintasun saria jasotzeko Euskadiko Kutxaren langile orok izan duten garrantzia nabarmendu zuen finantza erakundeko presidente Juan Mari Otegiak.

SIDERURGIA. Europako Batasuna babes neurriak prestatzen ari da

Altzairu inportazioen gaineko mugasariak atzo jarri zituzten indarrean AEBek

Agentziak | WASHINGTON-BRUSELA

Nazioarteko bazkide komertzialen protestei jaramonik egin gabe, Amerikako Estatu Batuek (AEB) agindutakoa bete eta altzairu inportazioen gaineko %30era arteko mugasariak ezarri ditu atzotik, bertako altzairugintza jagoteko helburuz.

Neurri horrek hiru urte iraungo du, eta eragin zuzena izango du Brasil, Japonia, Txina, Errusia eta Europako Batasuneko (EB) altzairu enpresetan, AEBetako merkatua eragotziz, kalte nabariak eragingo baitizkie. Horrez gain, merkataritza gerra baterako arriskua piztuko du.

Hasteko, erasandako lurralde gehientsuenek Munduko Merkataritza Erakundera (MME) jo dute protesta egitera, neurri hori legez kontratatzat jota. Izan ere, merkataritza librea aldarrikatzen duen lurralde nagusia lehenengoa izan da altzairu libreari oztopoak jartzen.

MMEren barruan EBko eta AEBetako ordezkariekin artean izandako bileran, europarrek urteko 2.500 milioi euroko kalte ordainak eskatu zituzkien amerikarrei, baina «AEBek eskaera jaso besterik ez du egin», adierazi dute europarrek.

Gauzak horrela, Bruselako agintariak babes neurriak pre-

tatzen ari dira Europako altzairugintza babesteko. Neurri horien ondorio zuzena, atzerriko altzairu inportazioa mugatzea izango da. Babes neurri horiek «bidezkoak eta lurralde errugabeen kalterako izan ez daitezen ahaleginak» egingo omen ditu Bruselak.

Hala, EBk finkatuko dituen inportazio mugak «orokorrak» izango dira, eta ez lurralde jakinei begira. Azken batean, helburua zera da: orain arte altzairua AEBetara saltzen zuten nazioarteko lurraldeek, eragozpenak ikusita, Europako merkatuak era handizkakoan bete ditzaten eragozteak.

LABURAEAN

Onenak hitzarmenagatik hasitako greba mugagabea behargin guztiek jarraitzen dute

Nafarroako Ibirikun dagoen Onena lantegiak greba mugagabea hasi zuen atzo. Lan hitzarmenaz akordioak lortu ez dutenez, lantegiko 122 beharginek lanuztea abiatu dute. Onenak paperezko poltsak egiten ditu. Langileek urte bateko lan hitzarmena eskatu dute; soldata igotzeko KPI gehi bi puntukoa izatea, eta urteroko lanaldia 1.732 ordutik 1.750 ordura jaistea. Asteburuan lan egiten denean diruz gehiago ordaintzeaz gain, bi jaiegun izatea eskatu dute.

Iparreko legatza babesteko neurriak luzatu egin ditu EBk ekaina arte

Europako Batzordeak legatza babesteko iaz hartutako neurriak luzatu egingo ditu, atzo Bruselatik jakinarazi zenez. Nahiz eta ez zen zehaztu noiz arte egongo diren indarrean, gutxienez ekaina arte mantentzea espero da, orduan bilduko baitira EBko Arrantza ministroak espezie hori berreskuratzeko epe luzeko plan bat hitzartzeko. Neurriak iazko ekainean hartu ziren eta alturako sektoreak gogor kritikatu zituen.

Bruselak gutxieneko eskubideak finkatu nahi ditu ABLEetako langileentzat

ABLEetako langileentzako gutxieneko eskubideak bermatzeko arau proposamena onartu zuen atzo Europako Batzordeak. Arau horrek Europako Batasun osoan izango du eragina, eta ekarpen nagusia zera izango da: enpresa batean sei astez lan eginez gero, ABLEko langileak ez du diskriminaziorik izango enpresa erabiltzaileko gainerako langileekiko.

LAN ISTRIPIUA

25 urteko behargin bat hil da Bergarako saihebidetan lanean ari zela deskarga elektriko bat jasota

Erredakzioa | DONOSTIA

Bergarako saihebidetako lanean beste behargin bat hil zen atzo. Ertzaintzak jakinarazi zuten, 25 urteko gaztea auto bat konpontzen ari zela jasotako deskarga elektriko baten ondorioz hil zen.

Bergarako saihebidetako erakartzeko lanetan erabiltzen duten auto bat konpontzera joan zen A.A.P. errenteriarra arratsaldeko 14:00ak aldera. Autoa konpontzeko altxatu zutenean, goi tentsioko elektrizitate kable bat ukitu zuen ibilgailuak eta deskarga elektriko indartsu bat eragin. Barruan zegoen behargina bertan hil zen.

Lau hilabeteen toki berean hildakoen bigarren langilea da atzokoa, iragan abenduan ere antzerako lan istripu bat jazo baitzen Bergarako saihebidetan. Orduan ere tentsio handiko kablea ukitu ostean zendu zen behargina, deskarga elektriko baten ondorioz. 22 urte zituen abenduan hildako J.C.J. langile nafarrak.

Gogor salatu zuen atzoko istripua LAB sindikatuak eta erakuntza sektoreko patronalari egotzi zion beharginaren heriotzaren erantzukizuna. «Patronalak ezinbestekoak ez diren segurtasun neurriak hartzen ez dituelako gertatzen dira horrelakoak», azaldu zuen Jantxo Latasa LABen erakuntza sektoreko arduradunak. «Enpresa buruek etekinak ateratzeko egiten dituzten ahaleginak segurtasuna bermatzeko erabiliko balituzte, ez zen halakorik gertatuko, baina argi dago horretarako ez dutela inongo asmorik, eta hildako gehiago egongo da oraindik», gaineratu zuen LABeko ordezkariak.

Egoera hori salatzeke protesta ekintza bat egingo du gaur euskal sindikatuak Bergaran bertan.

BURTSA. Urtaro berriarekin, arantzadun loreak agertu dira merkatuetan

Udaberri, lore berri

Joseba B. Andueza |

Lore berri asko loratu dira udaberriarekin batera: Greenspanek interes tasak ez mugitzea erabaki arren, balizko interes tasen igoeren lore gorria kasu; Gas Naturalek (-%1,2) Enagas ekaina amaieran loratu nahi du burtsara eta Espainiako autopisten kudeatzaileek, lorez

baina batez ere, arantzaz beteriko maitasun istorio bitxia bizi dute, bat-egitea eta Erosteke Eskaintza Publikoaren (EEP) artean. Moviles (-%1,71) ipotxak berriz kapital gehiago loratu nahi du. Kontuak kontu, BBVA (-%1,84), Telefonica (-%1,33) eta Repsol-YPFk (-%1,71) 8.400 puntutik behera kokatu zuten Ibex-35a.

DATUA

Gipuzkoa Donostia Kutxak Zeltia (+%1,32, 11,5 eurotan) botika ikerlearen %1,5 erosi du, akzioa 11,1 euro ordainduz. 33 milioi euro, guztira. Beste aurrezki kutxa batzuekin %5 eta %8 arteko partaidetza lortu nahi omen dute. Minbiziaren aurkako ikerketan dabil enpresa.

Bilboko 2000 indizea



Beste indizeak

New York (Dow Jones)*	10.556,66 (-%0,74)
Tokio (Nikkei)	11.526,78 (+%2,26)
Madril (IBEX-35)	8.390,10 (-%0,96)
Paris (CAC-40)	4.603,80 (-%0,89)
Londres (FTSE 100)	5.266,90 (-%0,93)
Frankfurt (DAX)	5.364,7 (-%1,79)
Milan (Mibtel)	23.754 (-%0,77)

* Egutegia arte

Dibisen merkatua

	Euro bat
Pezeta	166,386
Libera	6,55
Dolarra (AEB)	0,8814
Libera Esterlina	0,6196
100 Yen (Japonia)	1,1572